

文苑英華卷第五百九十一

表三十九

謝親屬加官

此卷英華所編失年代先後今正之

為魏王武承嗣謝男授官表一首

為王華暢謝兄官表一首

為桓彥範謝男授官表一首

為并州長史張仁亶謝長男官表一首

謝弟說除給事中自求改職表一首

謝兄除太常丞表一首

為李晉公謝賜兄章表一首

謝兄除補闕表一首

為許卿謝堂弟叔冀授青州節度使表一首



為崔僕射謝許弟寬宣慰表一首

此在後

代郭令公謝男尚公主表一首

此在前

為崔僕射謝弟除給事中表一首

為郭令公謝一子三品官表一首

代李僕射謝男賜緋魚袋表一首

謝妻封弘農郡夫人表一首

謝兄授太子僕表一首

謝兄授祕書省著作郎表一首

代尹僕射謝男宥授安州刺史表一首

代杜司徒謝男授官表一首

代杜司徒謝妻封邑表一首

謝兄除官表一首

為族兄瑗謝守度支尚書表一首

代戶部孫相公謝授兄太常卿表一首

為魏王武承嗣謝男授官表

武后

李嶠

臣某言伏奉恩制除臣息尚舍直長史某為左監門衛長史榮隨恩集歡與懼奔臣攀軫日車附流星漢才無天質藝以地高陛下每降皇情特垂聖蔭先親後疎之澤自葉流根謀孫翼子之慈愛人及息遂復推恩家室假職幼童參九等之班榮掌重門之禁衛賞延之命寧待於勲庸敦叙之風但緣於骨肉雖東平之子能趨拜咸錫印章齊國之地可割分悉侯支庶豈足以方斯嘉惠匹此殊渥奉絲

綸而仰德叩木石而論心受生於天但知榮荷曝骨於地何階酬答無任悚戴慙懼之至謹詣朝堂奉表陳謝以聞

為王華暢謝兄官表

武后時

臣某言臣兄某前某官某月日特蒙恩詔擢授武州司馬未及赴職即八月改除亳州司馬再三榮命叨荷恩私在臣宗門實為慶幸臣兄自歸解巾從仕三十餘年五為縣宰三遷州佐政皆通顯職實蕃勤直道在公有始終之節平心應物無造次之憊在於周行頗蒙推澤近屬虺寇構術惑亂豫州註誤平人自貽梟滅陛下憫荆河之俗遭此無辜弔海濱之人使同昭慶以為奉揚皇化者必管其才撫御窮人者亦資有德臣兄同濫承天獎遷移武州

天恩實為超擢今者未及赴任復蒙改授亳州重疊承恩翻同貶降朝廷體例實以為先臣兄弟叨榮濫竊非據臣兄既授不合冒聞但以始者承恩越蒙抽擢今有何過遂同左遷區區懇誠輒敢祈懇伏願皇恩有裕降昭獎之恩兄果竭忠獲展才之地小臣死日猶生之年臣無任

為桓彥範謝男授官表

中宗

吳少微

臣某言伏奉某月日恩勅以臣男某為某官臣實多幸偶遭皇運鳴玉以相建土而王大錫崇榮斯亦極矣先臣老

母復荷渥

一作湛

恩追亡寵存光被窳窳自妻及弟雙綬

一作

綬六珈闔門振耀惶懼

一作愧

未已今臣子某識惟髻弁

一作

年力服臣之榮為祿已甚更承天秩將何以

一作克

堪殊澤

荐臨斯厚臣寵一作閩門光寵敢不祗奉拜命之休無任悚荷之

至一作皆唐類表

為并州長史張仁亶謝賜長男官表中宗富嘉謨

臣某言伏奉二月十四日勅賜臣絹一百疋又奉其月二

十六日勅除臣男之輔尚舍直長史麗澤之來匪月而降

受賞轉級惟臣及子寵渥所分臣無與二夙夜惶悸萬殞

增惕然旌節所統緣邊千里禦寇既廣兵賦自殷受任非

據屢移年祀未能司大事而靜外處疑汔小康而蠲內役

而崇班厚貺載在臣門將何以祗拜殊渥光顯休命此微

臣所以有死無報也南望闕庭以榮受疑作懼無任慙款

之至謹附表陳謝以聞

處當作虞

謝弟詵除給事中自求改職表玄宗蘇頲

臣某言伏奉本月二十四日勅以臣弟左司郎中臣詵為

給事中嘉命猥臻一作惶怖相視榮以為感一作忙然失

圖臣某中謝臣兄弟一作數人獲承累代之庇自幼而長

惟愚與直臣一作某臣詵初一尉耳竊願從微守分置思

養拙邀榮而乾道曲臨一作門特幸前恩罔謝後忝仍

及生臣者父母寵臣者聖明非臣等殞首流腸少酌萬分

之一臣某中謝臣自叨清切頗歷星霜乏鍾會五字之敏

多王濛四年之任竟未能陳一策進一賢雕蟲粗辦其所

為濡翼久知其非據下慙先臣戒盈之訓上負聖主則哲

之明常甘屏黜以待髦俊豈悟臣詵復私成造比臣則行

有餘力選衆則曾無足言遂使聯事掖垣同趨階一作超陛
或紊公式必招私議臣知不可物謂臣何一作其宜安有兄弟
妄庸並居東西要近臣懷靦愧非敢身謀事或乖一作虧違
實塵皇揆伏乞羣臣自下之審察臣由衷之請一作至臣第
誥殊榮既拜奉綸紱一作緋而難迴臣頽薄技何成顧瓶筭
而易竭指於十手臣假遑寧不如一腋臣將焉用所冀移
臣職守允臣陳乞一作請抑朝章之是移一作移匪等列一作臣等之攸
宜悽悽款誠昧死期達無任悚荷屏營之至一作極謹詣肅
章門外奉表以聞又臣先臣某往忠社稷陛下特賜茅土
遂臣所讓因授臣第四弟又右補闕亦希別從選序不敢
同在近侍臣之感恩不識爲喻輕黷旒冕懼深沐一作唐谷一作唐類表

謝兄除總目太常丞表

臣某言伏奉今日恩制除臣兄某太常丞跪發詔書光
駭閭里寵益益懼喜極而悲闔門感恩垂淚相賀中謝臣
自登兩府倏至三旬天地之間未裨塵露雲雨之施已遍
公私撫心載驚顧影增惕伏以臣兄列官清憲專於察視
臣又承弼皇樞課其條職苟憊綱紀責在隼繩所以請移
別官冀循常序聖慈曲被命數有加獲陪卿士之行更列
大夫之後遇深賤質誠合懇辭恩及長兄不敢多讓誓將
死節上答生成云

爲李晉公謝賜兄章服表見六百二十九苑咸

謝兄除補闕表肅宗

臣某言伏奉恩旨臣兄前長安縣尉某特授左補闕內供奉賜紫金魚袋踰涯之澤忽降於重霄非次之榮猥延於同氣自天有命闔室相歡臣某中謝臣兄比因寇孽潛跡江湖臣侍奉皇輿委身巴蜀艱虞萬里兄弟一方分成吳越之人久切支離之恩陛下克清禍難再闢寰區臣兄幸遇休明得歸鄉陌雖骨肉之愛重喜如初而班秩已停久嗟失職臣昨因對奏遂竭懇誠情至所陳言將無隱陛下道弘孝理念廣睦親載懷遂物之仁爰軫在原之急皇慈曲被朝獎仍加擢同補家之司錫以腰章之寵况臣官參秩禮任在司言身上列於紫垣兄遽升於青瑣故得連枝捧日方金侍於軒墀比影朝天復惣華於朱紫一門受賜舉族增榮斯實眷自宸衷恩加望外臣比承顧使本不因入今又沐殊私特延慈旨投軀有地報德無階非臣灰粉所能答效惟當昆弟相勗以孝資忠螻蟻之負細塵誓將裨補烏鵲之銜微毳志願填河將九死而猶生豈百年之足謝云

此篇元誤入五百八十八卷公卿雜謝門今移入于此

爲許卿謝堂弟叔冀授青州節度使表

肅宗

于邵

臣某言伏奉今月二十三日恩制除臣堂弟叔冀青州刺史兼御史大夫充青淄等五州節度使不次之恩特出聖

鑿九秦之慶延及宗親彷徨若驚啓處無措臣某誠歡誠喜頓首頓首臣聞應天順人將將之道也保大定功將將之道也然後賞罰二柄懸于日月伏惟光天文武大聖孝感皇帝陛下睿謨廣運玄功莫測保天命以立極伏人心而戡難遂使妖不得爲災謀不得及伐動皆殲潰以靖神人如叔冀者曷爲力也徒以遠奉威靈獲全私懇雖堅守薄節轉戰微功而寵寄雄州榮兼獨坐爲叔冀之非望實舉宗之所懼今復割海岱之衆創立節度之權超將中軍兼領仍舊受委斯重其憂轉深屬餘孽未除誅剪指日策勲飲至責其總戎勉勵之心伯仲之分以此思効不遑居寧臣緬惟代業竊又自愧臣之父河西節度使先臣某叔冀之父平盧節度使先臣某皆中朝舊勳式遏寇虐東西故事人或賴焉而叔冀何功實庸克荷非臣所感時論皆榮追懷父子之軍信兼國家之報載競載躍無以克堪臣雖偶中外義形骨肉事濟時康死復何恨無任感恩競躍之至謹請某門奉表陳謝以聞

爲崔僕射謝許弟寬宣慰表

代宗

前人

臣寧言中使馬承倩至奉傳德音特自宸睠矜臣東身遠鎮兄弟別離許令弟寬與臣相見義切君父恩連骨肉神慮驚駭不知所之一生有涯萬死難報臣某中謝臣實最小衆所鍾憐臣在劍門強逾二紀形影相吊未嘗棄離忽遇聖朝委臣方面在寬何有累踐班榮職縮通曹貴通三

獨功慙汗馬業謝屠龍禁掖禮闈踰津越分每一念至刻
心如焚縱脂分戰場血染邊草未之云報降此無圖上感
推心下排飛謗惟此之際臣知所安但以蕃寇外虞蒼黃
後命飲至清廟或未尅期所冀覽來不失宣撫臣之願也
每羨聯行獨憐迴鴈長思共易不着新衣無任感戴慙惶
之至

爲崔僕射謝第除給事中表 代宗 前人

臣某言伏見某月日恩制除臣弟審給事中寵命自天驚
奄無地永惟非據覩面何深臣某載競載躍頓首頓首臣
家本東周代傳素業衣冠祖襲豈望繁華至於伯仲雖聞
詩禮但欲官常 一作詎知生遇聖明日加重寄擢臣偏將

鈔本空三字

之下錄臣久戍之勤待罪西南時逾一紀分憂障塞心係
兩蕃策無類於燒牛功有慙於求太長懷尸素之責重貽
門戶之羞今則恩聯兄弟澤及中外在審何者累踐通班
未聞三諫之勤仍忝八年之寵將何以曲承顧問接武名
儒分陪掖下之榮專掌殿中之事在盈知缺居寵思危臨
深履薄莫之爲喻伏以王居渙汗方鎮途遙遠有所聞推
疑作謝無及空慙爲人之擇不遂免冠之讓臣無任喜躍
屏榮之至

代郭令公謝男尚公主表 代宗 吳頌

臣某言伏奉某月日恩制授臣男駿試殿中監駙馬都尉
尚昇平公主聖慈曲被焜耀私門揣分慙恩以榮以懼臣

本寒素類表作愧類表非閑閔幼男弱稚類表作植又之義方

陛下以臣備位台司服勤王室特收賤族許以國姻宗黨

生光室家同慶門開魯館地列沁園事出非常榮加望外

恩深義重何以克堪榮軀粉骨不知所報無任感戴受恩

之至

為郭公謝一子三品官表

邵說見表類

臣某言伏奉二月二十一日恩制勅賜臣一子三品之官

并階鴻私曲臨寬守飛越臣某中謝臣聞祿位之設以待

勲賢苟非其人必貽伊咎臣之弱子未有令聞方且勵以

義方教之詩禮遽承殊澤將授崇班非唯有黷朝章名器

難假實亦懼招官謗顛沛為憂寤寐兢惶周知攸處况臣

榮登上相任重總戎子弟數人盡居右職過亢之誠切在

於心既懷棟撓之災寧忘屋漏之媿乞停寵命俯遂愚衷

庶幼童無冒進之嫌微臣有知足之誼無任感懼屏營之

至

代李僕射謝男賜緋魚袋表

令狐楚

臣某言臣得進奏院狀報今月七日聖慈召臣男公敏令

對見其日中使馬承倩奉宣進止賜緋魚袋欽承失圖啓

處無地臣某中謝臣才非動衆勇不兼人仰一作緣枝葉

獲展筋力荷天百祿幸據於周詩遺子一經誠慙於漢史

男公敏義方未教容止無儀伏蒙陛下召入清禁之中立

於丹墀之下遠憂顛沛伏用兢惶特受宸恩榮縮朱紱八

類表作豈意明命曲臨榮光下燭小鱗
生成之功不次浸
循佩忽帶金章褐衣纒解便縮朱紱

潤之澤無涯重若戴山輝如衣錦匈奴未滅方忍耻於愚

臣童子何知復受恩於聖主六姻交賀百衆同歡空竭節

於邊陲豈酬仁於覆載銘膚鏤骨不敢殞墜所守有限不

獲陳謝臣無任感戴屏營之至

謝妻封弘農郡夫人表 代宗 常衮

臣某言伏奉恩命賜臣妻楊氏邑號封弘農郡夫人伏以

古者卿大夫之妻咸曰命婦亦曰一作內子但有稱謂皆

無封邑其後雖有名窳延鄉陳留風俗傳漢與項氏戰厄

延鄉為封丘縣以封崔杼英之錫亦無夫人之號唯漢魏

戚里晉宋外家平原清河疏郡以馭貴建昌高密洛邑以

睦親猶止於郡縣君而已近代著令國朝相襲階至三品

妻封夫人上比鵲巢遠齊崔蒨禮秩兼盛等威稍逾其或

襄贊類表作勲臣光華戚屬以茲而授尚可相循臣以凡

賤謬承委遇尸職已久愧心匪寧仰酬國恩分寸未展內

省家事茲渥過豐又蒙曲私霑及主饋特封嘉號載錫徽

章中壺慶其秩高外姻賀其禮盛儀參貴列寵極私門自

顧何功叨榮至此頓逾涯分退益兢惶無任荷戴屏營之

至謹奉表陳謝以聞

謝兄授太子僕表 代宗 前人

臣某言伏奉五月十七日恩制授臣兄依前秘書省著作

郎太子僕特恩曲降殊私一作下霑踴躍宛轉競惶震越

郎太子僕特恩曲降殊私一作下霑踴躍宛轉競惶震越

郎太子僕特恩曲降殊私一作下霑踴躍宛轉競惶震越

臣某誠歡誠懼頓首頓首臣自承錄用已積歲時內省微
功未申消瀝虛受祿俸有覲官榮在公無益於已多罪一作

已寬及私之幸又獎臣兄伏以頃冒朝章兄合坐罪一作

伏蒙慈貸仍進常班庇一作賤孤門已墜復立蒸嘗獲主

將廢更存寵被幽明感涕橫集一作戴求之古今一作無

臣此例雖肝膽塗地未塞前責而糞土餘生尋加後命臣

授方鎮一作兼錫崇階兄拜宮僚又參高秩慶聯鴈序澤

及翺一作飛承命若驚何功至此愧心踧踖赧汗流離非

望驟遷罔知所措殘骸萬死難以上酬無任感荷兢抃之

至謹遣散將某官某奉表陳謝以聞一作皆唐類表

謝兄授秘書省著作郎表代宗前人

臣某言伏奉閏五月二十四日恩制授臣兄太常丞秘書

省著作郎臣待罪兢灼啓處不遑寵命荐臨驚抃失次臣

某誠喜誠懼頓首頓首臣上負國恩自抵邦憲聖慈矜宥

屈法全生猶許自新特虧令典一作特令典郡惶怖殞越夙夜載

馳雖荷殊渥尚憂嚴命臣兄今一作從連坐伏待貶官不

謂玄造曲成鴻私下覆在憂惕之際特受寵榮當譴斥之

時忽承遷轉品秩下降清望有加復齒周行獲陪班列向

非親紆聽斷俯燭幽微則骨肉分竄於殊方簪裾未絕於

昭代豈望更霑人次再沐朝奉罪重丘山恩過天地感戴

慙報俯伏驚惶臣竊自思惟無所上報庶將懲改前過克

勵殘骸苦節誓心冀申萬一無任感恩惶一作懼之至

一作皆唐類表

代伊僕射謝男宥授安州刺史表

憲宗

呂溫

臣慎言伏奉某月日勅

集作制書

授臣男宥安州刺史兼侍御

史克武昌軍兵馬留後仍賜紫金魚袋者雷驚里巷日照

閨門寵命自天戰跼無地臣誠懼誠感頓首頓首臣聞惟

君任臣固無虛授知子者父敢私不才臣頃者伏以聖政

惟新時清無事遂絕指縱之望求申戀主之誠陛下以臣

統兵

集作所統

歲深周涉

集作旋

艱險長三軍之子弟積百戰之

瘡痍將有去留念其情義理資感勵事貴便安爰勅臣男

試總戎務臣雖訓之以義教之以忠而鈍拙

集作朽鈍

有涯策

磨靡及童兒

集作子

代斲每懷傷手之憂小子

集作兒

在邊

無折屐之喜將何遽膺寵數

集作命

荐沐恩光真授竹符就

加金組且初午之為軍尉父已懸車陸抗之將父兵子非

綵服豈比臣身居端右男領方州鳴玉會朝朱轡行縣

集作

樂焜耀中外超冠

集作冠超

古今名數之樂何加

集作如

人臣之

事斯極千載至公之運獨被殊私萬物咸遂之辰先蒙曲

澤瀝肝呈膽莫盡微誠毀族滅身

集作滅

寧足上報臣無任

感恩殞越之至謹奉表陳謝以聞

代杜司徒謝男授官表

劉禹錫

臣某言伏奉今月一日制授臣長男師損祕書省著作郎

次男式万太常寺主簿又得進奏官裴遵狀報伏承聖恩

特降中使送官告到臣宅分付師損者寵渥非常授任不

次驚躍無措覩懼失容臣某中謝臣繆分重寄獲守外藩
 受恩既深無績可紀男師損等器惟凡品教闕義方早沐
 睿慈已階官次每懷塵忝常誠蒲盈豈謂鴻霈曲覃大明
 私昭寬臣尸素之責念臣葵藿之誠命下延恩集作下叨
延胤息
 踐班級天書出禁中貴臨門榮冠等夷慶流宗族况著作
 乃撰論之地唯史才是居太常寔禮樂之司非儒者勿履
 顧茲庸謬集作昧忽此超昇內省慙惶若墜冰谷伏以聖朝
 立制建官惟賢名實無乖輪轅盡適微臣父子獨為幸人
 非據踰涯自中徂外虛受丘山之賜實增負乘之憂進退
 徨徬不知所履集作據無任戰荷屏營之至

代杜司徒謝妻封邑表

憲宗

王仲周

臣佑言伏奉恩制封臣小男母李氏密國夫人臣某中謝
 伏以禮經明文婦人本無爵命秦漢以降優賢以寵閨門
 固無繆及有紊獎典臣小男母李氏本非主饋若貴云因
 予臣男尚自賤微禮有從夫臣妻又早逝歿豈伊末品忽
 被殊私此盖陛下念臣齒髮漸衰賓祭無主俾立家而有
 裕遂開國以疏封詩美鵲巢懼無德而自處禮榮翟菲恐
 負乘以貽災瞻上天而以懼以慙顧中闕而載榮載躍不
 任荷懼屏營之至

謝兄除官表

歸冕

臣某言伏奉某月日恩制授臣兄前湖南觀察判官侍御
 史內供奉賜緋魚袋國子監博士雨露殊私忽霑微賤儒

雅盛職光寵衰門承命宸驚感恩躍踴臣聞聖王勸學序
序爲本故堯命后夔典樂以教胄子周立師氏以教三德
漢制博士以教五經歷考校學之官蓋今博士之任用人
之選非賢莫居臣兄幸遇昌時守臣之訓孤貧好學以傳
家業而聖代推恩遂及兄弟位登五品光賁一門感鶴鴿
之詩增友悌之愛齒羔鴈之序媿苟陳之才况臣受任方
隅莫申涓効寵榮荐及灰粉難酬誓期殺身以酬萬一無
任感恩殞越之至

爲族兄瑗謝守度支尚書表

王涓

臣某言伏見詔書以臣族兄瑗守度支尚書三元告慶萬
國朝宗榮命與璧月相輝厚澤與金雲並潤顧其疎薄

不獲驚臣某中謝臣聞坳堂之水必膠於置杯曲木爲資
無階於刻楫何則適用之風斯替其効靡成失材之道旣
彰厥功寧若相彼庶物尚或其然矧伊名器理難冒居一作
明微臣自料浮淺業藝何甄德匪潤身學慙爲已文辭小
道曾無沉鬱之才刀筆淺能非有精明之舉特以夙因多
幸遙奉承華猶見錄其疲駘且弗遺其管蒯高榮好爵疊
委疑作屨屨縻入掌便繁傍參侍從事然積步竟慙一割竊
妨賢路深希退託降階之念空誓丹愚昭著之恩更彰綸
綬差肩六尚方駕八元內省輜輕義無祇冒伏惟陛下明
兼七曜照及九幽寧在微臣近虧則哲特願褰茲旒纒察
是芻蕘迴此如繪矜其匪石則失應之善末息得人之美

載揚物議允諧朝經式序不勝云

代戶部孫相公謝授兄太常卿表唐末 錢珣

臣某言伏奉今月某日勅命授臣親兄太常卿檢校右僕射者霑澤下臨私室相慶臣某誠歡誠荷頓首頓首臣兄某抱公藏器據德有鄰為善而不欲近名從政而但思利物自臣遽升台輔獲導化源雖向國去秘疑戒臣常切而入門避事遠謗每深出趨垂拱之朝退務掩關之樂陛下禮行舟楫念及墳笮慰其友愛之懷進以優崇之秩伏以九卿之位歷代所尊舜以三禮命伯夷漢以奉常加稷嗣倚古則重得人始光用典之難敢言兄氏方懷慚惕忽荷皇私而階峻銀青寵兼端揆喜溢在原之屬恩加電疑竹軸當

之臣既激弼諧且弘名教股肱作輔莫成鎮撫之功手足相須但有胼胝之誓臣無任

校正五十六字 十月初四日

文苑英華卷第五百九十一

文苑英華卷第五百九十二

表四十

謝文章

謝撰懿德太子哀策文降勅褒揚表一首

謝撰攀龍臺碑蒙賜物表一首

為納言姚璿等謝勅賜飛白書表一首

為文武百僚謝示鏡圖表一首

謝賜碑額表一首
謝修史表一首

為李僕射賀聖製政刑箴表一首

為戴中丞謝賜中和節詩序表一首

代李令公謝手詔為製東渭橋碑文表一首

代陳司徒謝勅賜麟德殿宴百僚詩序表一首

臣璿等言今月十一日侍晏蒙恩作飛白書題臣等名字垂賜跪承寶貺仰戴瓊文如披七曜之圖似發五神之檢九霄靈澤與垂露而同霑千載嘉祥共廻鸞而並集冠六文而首出掩八體而孤騫恥乎若遊霧之拂春林翳乎似輕雲之上秋漢頡皇之始模蟲篆未足多奇劉后之嘗學史書孰云能擬固已工踰懸帳妙盡刻符鍾繇竭力而難比伯英絕筋而不逮則知乃神乃聖包衆智而同歸多藝多才總群方面兼善諒天機之獨運豈凡識之能窺臣等才埒瓶筭任叨衡右器滿之誠每切於愚心棟隆之吉實慙於明代而天慈曲獎聖造不遺厚祿尊官既殫恩而極寵良辰美景又申歡而接宴慶方行而已及澤未溥而先加殊恩與骨肉等深縟禮共衣冠相絕今復親陪春賞特流宸翰羸氏之魂遊天上未比超昇闕生之名在月中詎方遐邈昔者韓稜深博肇蒙於署劔田鳳名流僅聞於題杜未有芝英草聖近縟於絲牋合璧連珠俯光於掌握在臣叨忝獨冠古今方且示彼記言傳諸貽訓表一人之殊寵留百代之榮觀手舞足蹈徒申踴躍之心摩頂至踵豈答生成之施無任欣戴之至謹詣闕奉表陳謝以聞

爲文武百僚謝示鏡圖表

邵說

開元十八年張說已奉此表乃代宗時英華作張說非

臣等某言某日開府魚朝恩以所造周易鏡圖於中書門下奉宣聖旨傳示臣等仰觀易象遠見天心捧對循環載

欣載躍臣某中謝臣聞太極既立是生兩儀六書以畫卦
四營而成易備君臣父子之道盡陰陽變化之原理亂吉
凶必以類應自古哲后曾未研精爰及近臣莫聞訓習而
朝恩深窮損益績以成圖陛下重有激揚示之於外臣幽
觀妙用周覽玄言警誠人君恢張治道陛下欲成其政必
在動而行之儻能建中於民實亦天下幸甚臣無任

謝賜碑額表

張說

臣說言伏奉今日恩旨賜先臣碑額悲荷交心拜捧以泣
臣某中謝臣亡父先臣隲安貞下位不符昌辰先帝贈之
以專城陛下日之以積善光貴重溼感慶三泉舉宗悲喜
外姻歡賀昔孔篆吳札之墳秦存里子集作之集作辭集作
輕列國義小陪臣豈若天王禮士鳳書旌墓榮軼曩賢道
映來籍在臣在子移孝為忠心効草木何酬雨露無任幽
明感戴之至謹奉表陳謝以聞

謝脩史表

前人

臣某言伏奉本月十六日勅令臣在家脩史捧恩戴命且
喜且慙臣服道儒門策名昌運掌綸四后載筆三朝階緣
宿遇登集作躡端揆職為劇於心盡史無用集作而功廢
自貽官諉待罪私門及集作魯之感特集作深藏周之望
已絕豈意特流天旨重緝簡書雖才慙左丘集作而時盛
周漢况復編堯舜之年事皆目覩叙義黃之德音匪傳聞
善志集作將訓於百王實錄可貽於千古國家之鴻業辦

矣朽臣之至願畢矣不勝天恩難任之至謹奉表附內侍
尹鳳祥陳謝以聞

爲李僕射賀聖製政刑箴表

崔位

臣某言伏見聖製政刑箴天文昭回八表皆燭睿藻稽古
六經不刊其中謝伏惟皇帝陛下致理和平躋人壽域
猶懷兢業重設箴規酌哉成立政之中求司牧措刑之本
信成康之能事蓋堯禹之用心可以萬邦作孚千載垂範
金石不朽日月俱懸爰自繩契已遠歷選列辟憲章代有
詞義罕攻湯製局促於盤銘虞歌淡泊於琴曲橫汾乃縱
賞之事黃竹匪勸誠之文其餘流薄國風漂淪樂府典謨
雅誥寂蔑無聞曷若光啓格言昭融至道勤萬機於一日
二日立盛德於先天後天長垂四日之明詎假百官之獻
臣職惟方鎮宗忝葭莩成誦已在於丹心述宣願播於青
史臣限以所守不獲奔走闕下拜舞天階無任捧讀跪戴
抃躍之至

爲戴中丞謝賜中和節詩序表

馬總

臣某言中使至奉宣聖旨賜臣勅書手詔并御製中和節
詩序及尺等天貺荐臨睿文亮發仰觀俯愧祇懼若驚自
受殊恩守茲遠鎮才拙日淺政未及人陛下頻降寵私驟
施惠渥雖大君獎飾其道則然微臣駑猥豈宜及此臣聞
先聖有作不相沿襲苟合天理順乎人心則可以垂憲百
王布諸彝典側覽明詔以二月一日爲中和節事因祈穀

便賜歡娛，兼賜臣御製書序一本，尺一枝者，伏以仲月良辰，首建嘉節，朝野慶洽，君臣樂康，助萌芽之發生，擬天地之含育，誠所以跨越周漢，邁絕古今，况聖人麗藻高懸，日月皇儲妙翰益覩，文明誕告，萬方孰不歡抃，文書同律，度禮均衡，石以尺頒，賜固協其時，敢不佩此謨猷，謹於軌範，限守邊鎮，遂闕稱觴，徒觀宴鎬之詩，不厠賡歌之末，無任兢荷歡躍之至。

代李令公謝手詔為製東渭橋碑文表 于公異

臣某言某月日某至伏奉詔命以臣收復聖旨褒揚特為製東渭橋碑文皇太子書手詔賜臣及將士者驚拜捧荷魂神飛越臣聞霍光戴漢輔昭立宣鄧禹佐下寧人除暴

或道扶衰運或功格皇天纔聞麟閣之圖適及雲臺之紀未有事微賞厚用淺報崇迴辰象之天文降明離之筆札跪捧尋繹慙惶失圖事出古今感深臣子雖百身殞越曾未賈於片言九族隳離實難酬於一顧臣某中謝伏惟皇帝陛下邁軒皇之武德續唐帝之文思六義不足以財成五聲徒表於宣暢躬親庶政而睿藻日新化洽萬方而宸章間作頃屬克徒扇結都邑震驚陛下克讓斯在推功勿居迴天漢之文章賜光輝於臣下英聲茂實演奧窮微昭宣造化之情黼黻義文之制顧乃上拔彥範次述子儀此皆功贊中興道化來裔纂循前緒陛下定紹於耿光瞻慕勲庸微臣固無其影響此皆二字陛下特標文字曲降恩

私激揚雅頌之風傲厲人臣之節自家刑國垂範作程恩誠借於微臣道將周于天下足使懷忠服義爭死節以駿奔反側危疑望皇風而懲革史籍之所未有自此而書人臣之所未聞自臣而始雖年踰知命筋力尚全國家西有未賓之戎東有乘邊之寇每煩宸慮尚集王師顧此生涯未知死所庶損微瑣之質少益覆載之仁限以戎鎮不獲奔赴闕庭輕陳懇悃無任荷載惶灼之極

代陳司徒謝勅賜麟德殿宴百僚詩序表 王維

臣某言支使某官奏事廻伏奉某月日手詔賜臣以皇太子所寫聖製麟德殿宴百僚詩序日月揚光風雲動色捧受之次震駭失常臣某中謝臣伏以經天緯地者聖人之

文多才多藝者元良之美逖聽前脩旋觀往冊考論盛事罕見全能故漢后詠歌有乖雅頌之旨周儲聰哲不聞翰墨之妙伏惟陛下道洽帝堯文趨繫表體陰陽之變化與雲漢而昭回皇太子德邁生知學資聖訓掩鍾張之筆札並虬鸞以飛動臣特承湛恩荷此殊錫集榮光於外府啓重寶於私庭班氏賜書既甚懸隔馬卿檄草曾未比擬又臣所獻奉和詩事等疑作歌情同率舞濫吹之音謬塵於天聽踰涯之賞忽降於絲言豈臣微力所宜負戴非臣捐軀所能効益無任榮荷感惕之至

謝賜中和節御製詩序表

臣某言中使至伏奉手詔并賜臣皇太子所寫御製中和

節詩序聖澤曲臨天文下降日月爛其光彩風雲蔚其氣
色捧讀驚駭魂守失常臣某中謝臣伏以天地有常萬物
必由其化陰陽不測聖人能爲之節然後垂文章以鼓天
下之動張宴樂以道導天下之和三五以還盛美斯在伏惟
陛下以道御物以文化成立言盡經緯之本秉筆節陽和
之中雖天旨玄深理絕於彌度而眷詞煥洽義歸於德邵
文輝三象諧同六律邁殷湯之晨露掩虞舜之薰風皇太
子以聰哲之姿篆隸之妙鸞鳳之勢鍾王莫儔臣備守外
藩獲承殊獎荷此非常之賜實惟希代之寶窺觀則河漢
無極負戴則山岳爲輕沉族捐軀何階上答不勝欣感之
誠謹獻應制詩一首章句踈蕪義理鄙淺君唱臣和款逢
宴鋪之時濫吹徒歌輒効鈞天之末塵清風旒宸伏深戰懼
無任祗惕之至

爲李大夫謝御製詩表

常袞

臣某言伏奉恩旨賜臣詩一篇并酒脯文廻睿思忽懸日
月之光膳自御厨更覩雲天之樂感恩抃躍受賜兢惶施
已重於丘山功未中於毫髮賞則過望臣何以堪無任感
戴悅豫之至謹表陳謝以聞臣某誠歡誠喜頓首頓首謹
言

校正二十二字

十月初四日藏園記

文苑英華卷第五百九十二

文苑英華卷第五百九十三

表四十一

謝春冬衣

附 祿廩

謝賜春衣及牙尺表一首

為武中丞謝春衣表一首

寒食謝新火及春衣表一首

謝勅書賜春衣并尺表一首

謝春衣并端午衣物表一首

謝春衣表二首

謝冬衣表十三首

謝勅書兼賜冬衣表一首

謝加賜防閣品子課及全祿表一首

為第五舅謝加賜防閣品子課及全祿表一首

謝恩賜粟表一首

謝恩放先貸斛斗表一首

蘇州謝賜表一首

謝賜春衣及牙尺表

呂頌

臣某言中使至伏奉某月日勅書及所部將吏僧道百姓等伏蒙聖恩慰勞并賜臣手詔及春衣兩副金縷牙尺一面大將衣若干者天睠遐臨恩波荐及跪承寵賞以懼以慙臣某中謝伏惟陛下德配二儀恩覃九有雖雲雨之施在物無遺而溥澤所加於臣為幸誠以任叨藩鎮才本庸虛威畧不足以暢皇風政術不足以裨朝政顧慙曠職常用疚懷今又特降寵臣俯延殊獎頒以尺度承春令之溥臨賜以衣裳荷天慈之遠覆榮均將校慶被蒸黎歡心積於中謝喜氣盈於五嶺臣往塵近掖負敗已彰泊守矣恩禮彌厚實懼無功之賜敢安逾分之榮仰戴鴻私捐軀寧報無任感恩瀝懇之至

為武中丞謝春衣表

劉禹錫

臣某言中使某奉宣聖旨賜臣春衣一副玉人臨第御府降衣拊舞失容捧戴無措臣某中謝伏以律當春暮慶洽時邕萬物被薰風之和九天垂湛露之澤臣受任非次速尤是虞方懷匪服之憂更荷解衣之賜恩加盡飾拖朱紫而集作為榮受非以庸顧形影而知集作愧丹誠徒罄玄造難酬無任踴躍感恩之至

寒食謝新火及春衣表

武元衡

臣某言中使至奉宣進止賜臣新火及春衣等熒煌自天
織麗同降東帶歛衽盡飾之道已加捧炬迴光照臨之榮
荐及臣某中謝臣以薄才濫居臺憲職官尸祿驟涉歲年
陛下未責前過尚容舊職忝陪班列兢惕每多載冒簪纓
慙惶益甚今時惟清明律中姑洗當改燧火既荷惟新之
恩未去緼袍更沐衣輕之賜猥霑鄙陋曲被幽微臣雖至
愚豈不知愧伏以先皇之德未報陛下之澤又深揣分循
涯過叨獎遇將仰申禪補俯効涓埃惟當以火燭心焚灼
不忘於盡瘁以衣勵已曳屣常誓於糜軀嫉惡觸邪進賢
惟善有死莫貳知無不為伏冀聖慈墜臣丹慊一作無任
踴躍屏營之至

謝勅書賜春衣并尺表

令狐楚

臣某言去二月日中使某至伏奉勅書手詔并賜臣春衣
一副牙尺一條宸翰威蕤寵錫稠疊捧受榮抃如將不勝
臣聞衣裳在笥與必有道刀尺為器用惟其人臣魯國小
儒漢庭下士因緣霑澤汗染官牒顏嘗忍愧心不容憂陛
下仁發於中惠周於外矜臣以濕暑之患賜之葛衣念臣
無忖度之能降其寶尺輕新有楚廣袂不踰被服而炎蒸
坐銷秉持而長短立辨揆才量力將何補於分寸運肘延
頸實有塵於領袖當期畢命無以酬恩臣無任

謝春衣并端午衣物表

前人

臣某言今日日中使周某至奉宣口勅賜臣春衣一副并

端午衣一副銀枕一口百索一軸累受寵光載懷兢懼自
揣涯分若臨冰淵唐臣某中謝臣以昧於知人交通元載合
從牽累伏待刑章豈謂俯迴宸翰特有殊賜罪當褫帶忽
頒御府之衣憂可傷生重延長命之縷更加珍器曲被深
恩徒懷推食之仁立遣疑作素飡之責施均雷雨荷重丘
山雖畢命以自期終粉身而無恨臣無任云

謝春衣表

前人

臣某言中使某至伏奉勅書手詔兼賜臣及大將軍等春
衣一副金縷牙尺一條拜奉天書光生萬里即受殊賜喜
溢三軍臣某中謝臣素以庸虛特承聖獎寄深分闡恩重丘
山祗奉朝章布宣皇澤藩夷即叙懸道廓清將士無感衣
之勞四時沾衣服之賜况榮頒尺度禮叶典經敢懷寸進
之心空積違顏之戀臣無任云

同前

劉禹錫

臣某言中使陳日華至伏奉聖旨慰勞臣及將佐官吏僧
道耆老集作百姓等并賜臣墨詔及春衣兩副大將衣四
副王人捧詔御府降衣寵光不隔於遐藩慶賜猥霑於裨
將臣某中謝臣素乏器能謬膺驅使每慙効薄常懼食浮陛
下單以至仁均其厚施宰元和而布澤順時律以頒衣出
自禁中賁于臣下執領禮而林舞失次被緘柔而顧眄增
輝舉體動容既安且吉在身不稱恐招鴛翼之譏居任集
位無功叨受鶴紋之賜下延將校同荷生成云

謝賜冬衣表

陳子昂

臣某言中使某至伏奉某月日勅書慰問將士官吏僧道
 耆老等并賜臣手詔及冬衣兩副大將等衣一十五副者
 天慈遠致聖澤傍流海隅臣庶忭舞相慶臣某中伏惟陛
 下道弘文武任切藩維遠念戎旅之勤亟頒時節之賜臣
 以謬膺寄理載涉炎涼効績無聞徒負歲時一作負恩私
 每降慙懼不寧今又俯浹宸慈曲延寵賚當戒寒之初候
 冰挾續之殊榮佳氣集於城池喜容生於草木三軍叶慶
 萬井相歡况臣荷寵逾涯忝恩滋甚營燭無裨於景曜畎
 澮徒願於朝宗竦踴遐方感戀俱切無任感恩荷懼屏營
 之至

同前二首

呂頌

臣某言中使至伏奉勅書手詔并賜臣冬衣一副大將衣
 兩副九霄垂露忽降天文萬里飛輶更頒盛服臣某中謝臣
 凡庸淺劣才不逮人謬荷國恩猥居方鎮自宣風撫俗猶
 未周星朝章已布於蠻夷聖澤載覃於遠道將士等干戈
 久戢歲月空深曾無橫草之功累受賜衣之慶伏以陽和
 生植不隔薰蕕日月照臨寧分遠邇喜溢要荒之外榮均
 將校之中蚊蚋力微丘山難荷無任感戴兢惶屏營之至

二

臣某言中使至伏奉某月日勅書慰問將士官吏僧道并
 賜臣手詔及冬衣兩副大將衣五十副者清禁絲綸特臨

遠鎮中天雨露忽灑炎州感戴殊私抃躍無據臣某中謝臣
頃踐臺司已招負敗洎分戎閫又寡威謀陛下駐纘闕遺
含弘尸素恩深全宥德邁生成地偏而頒賜每臨節換而
授衣先及王人宣勞降自烟霄宸翰昭融如瞻日月綢繆
睿睠咫尺天顏三軍激踴躍之誠五嶺溢謳歌之響皇慈
溥洽顧品物而均榮寵渥謬加在微臣而增懼非勤勞以
受賜徒跼踖以祗恩灰壤爲期豈云上報感恩荷懼屏營
之至

同前三首

皇甫冉

臣某言中使某至伏奉勅書手詔賜臣及兵馬使都虞候
冬衣各一副拜受綸言跪承珍服荷同山岳懼比冰淵唐

臣某中謝臣功微草芥寄重藩條每懷尸祿之羞實負曠官
之耻豈謂天文廻照不隔於遐方御府頒衣更蒙於陋質
傍沾偏將曲被殊私挾纊既及于三軍酬恩將期於萬死

無任

云

二

臣某言伏奉聖恩賜臣冬衣四襲跪捧驚喜抃躍交馳臣

某中謝

臣功效微薄任遇寵榮使降專人衣裁御府寵光既

極恩已及於解衣雨露旣濡德又承於挾纊實亦發輝陋
質煥赫私門未知此生何以仰報謹當訓勵師旅式遏邊
醜用宣力於百身酬鴻私於一顧無任

云

云

三

臣某言某月日中使某至伏奉勅書手詔並賜臣冬衣一襲者清風早至白露初凝方思挾纊之溫忽報頒裘之禮跪拜受服形愧惕然臣某謝中臣學非博古才不動衆幸逢開泰列在方隅天高地厚未知所答而時雨露洗太陽昭燭王人捧詔每降於上天御府賜衣不遺於下土既其輕暖加之麗密束帶而立周旋有光驚寒沍之難侵賀威靈之曲被無任感恩

同前

權德輿

臣某言九月二十日中夜孟國瑤至伏奉某月十七日勅書手詔慰諭臣及將佐僧道百姓等并賜臣冬衣兩副大將冬衣共四副者詔旨曲臨慶賜旁集凡在裨校一其惟

愉臣某誠歡誠喜頓首頓首臣自違奉闕庭保釐河洛與戍師式遏之任非封部底貢之勤坐叨名器所謂尸素日月云邁寒暑迭來再及授衣之辰每蒙挾纊之澤被服輕煖章施賤陋彼已不稱於臣則多雖竭捐軀之誠豈迹濡翼之刺撫躬愧畏上答何階無任慙懼感戴之至謹奉表陳謝以聞臣某誠惶誠恐頓首頓首謹言

此篇誤編在六百三十三卷狀門今移入于此

同前

令狐楚

臣某言某月日中使至伏奉勅書手詔等捧戴拜賜榮感兢惕軍城歡抃海曲光輝臣某謝中伏惟尊號皇帝陛下至仁育物玄德統乾恩被生靈惠周遐邇臣猥蒙寄任謬領

方隅寒暑驟移度績罔紀王人忽降慈旨曲臨涉遐遠之
道途敷殊常之渥澤詔書既啓仰觀垂露之華珍服俯臨
實懼維鵜之刺慶同戎府榮及閨門况節戒玄冬戀深丹
闕授衣感自天之錫盡力堅粉骨之誠屬垂溥天和布代
化萬方昭泰四海無虞空知報効之勞願同犬馬未展涓
埃之績何答丘山寢興靡遑慙懼交集無任受恩悃懇之
至

同前

劉禹錫 集無

臣某言德音爰錫降自煙霄黔黎沐賜共承睿渥臣某謝
伏惟皇帝陛下誕敷文教丕變時雍遐邇克清翔泳咸若
臣繆膺寵任每愧素飡荷海岳之私無毫釐之績式用衣
裳在笥之戒惟媿輕暖被身載詠維鵜在梁之詩罔知死
節之所誓當訓勵士伍寧輯閭里盡瘁竭心以酬天造臣
與大將等無任感戴屏營之至

同前

前人 集無

臣某言恭承御封捧授恩錫喜懼交集精蒐若飛臣某謝
臣夙荷寵榮累伏旄鉞西戎未殄無式遏之勞東郡已安
有息偃之逸高秋空度未夕知慙陛下亭育深慈生成大
德三軍挾纊俯聽綸言九月授衣載馳天使臣被服既畢
感戴難勝誓當罄節苦心死生立効敢以微軀陋質麗靡
自安臣所守有限不獲奔走丹墀犬馬微誠伏增竊戀臣
無任云

文苑英華 卷之五 前

為杜相公

前人

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣兩副大將衣四副者大明昭回遠燭下土殊錫稠疊延及偏裨慶忭失圖捧戴相賀臣某中謝臣謬承委寄獲守藩條灰瑄屢移塵露無補陛下至仁天覆玄化風薰願以兼衣賁茲瑣質降自天府光于轅門緘滕既開覩綵章之盛飾蹈舞而服發溫燠於初寒愧塵補袞之名更荷解衣之賜恩波下浹將校同霑共戴殊榮咸思竭節生成是荷雨露難酬臣無任云云

同前

符載

臣某言中使某至伏奉詔旨并賜臣及將士冬衣等來自

九天頒于下土手捧目視霞開雪疑是何耿爾之賤質膺此爛然之盛服臣某中謝臣久在藩條無裨政術每懼素餐之責以成負乘之羞陛下含貸優容天覆地載伏念微臣之羸老且憂將校之寒洵賜之以衣服寵之以光榮俱無汗馬之勞已有維鵜之刺雖君父德大不求於所酬而臣子感深自期于必死無任感恩懇激之至謹奉表以聞

謝勅書兼賜冬衣表

獨孤及集無

臣某言伏奉某月日勅書慰問將士等跪承寵錫仰荷天慈朴躍周章不知所措臣某中謝陛下體仁恤遠崇德念功恩浹勲賢禮優方國臣行能無取志畧非長徒以嘗謬台司遂叨藩守誠寬覆餗之罪更切致寇之憂豈謂宸睠不

遺天波荐及獎飾加於尸素恩竟逮於庸微嶺嶂萬里迴
日月之私照偏裨一介沐乾坤之厚施緇黃載躍班白相
歡騰喜氣於城壘舞祥風於旌旆臣曠官已久無補休明
戀闕慈深又移寒燠累忝逾涯之賜敢安非據之榮立山
至重灰壤寧報無任感恩戀主屏營之至

謝加賜防閣品子課及全祿表 李嶠

臣某言伏奉恩旨加賜臣防閣品子課及全祿並以特進
全給身若在京仍朝朔望者臣自叨榮職無補分毫抱疾
沉疴有踰年歲蒙賜臣骸骨得守立園方從麋鹿之遊分
隔鶴鴻之侶不謂皇私廣被天造曲成迴日月之光更臨
幽側降雲霄之澤俯潤凋枯歲時頒廩藏之儲朔望接綬
紳之禮無績無効虛忝於恩榮非才非賢謬霑於祿秩仁
慈出於分外寵渥生於望表立山厚澤猥及下流草木輕
生何階上答臣苦腰脚軟弱不獲躬詣闕庭拜謝無任慙
悚喜荷之至謹因番守奏事奉表陳謝以聞

爲第五舅謝加賜臣防閣品子課及全祿表前人

臣某言伏奉恩旨加賜臣防閣品子課及祿并全給身若
在京仍朝朔望者臣運偶時來久叨匪服鍾鳴漏盡得保
懸車逢舜歷之邕熙遂堯人之耕鑿乾坤含養之德尚貸
光陰雨露霑霈之恩不遺枯朽特降綸旨優加祿秩更沐
天慈許朝朔望大賜造於平分之外收無能於委棄之餘
荷澤蒙榮空深於林躍殘生餘喘豈期於答効無任慙悚

喜荷之至謹附中使某官某奉表陳謝以聞

謝恩賜粟表

劉禹錫

臣某言伏奉今月一日制書以臣當州連年歉旱特放開成元年夏青苗錢并賜斛斛六萬碩仰長吏逐急濟用不得非時量有抽歛集有於字百姓者恩降九天澤周萬姓優詔纔下羣情頓安某誠歡誠喜頓首頓首伏以災沴流行陰陽常數物力既竭人心匪遑輒敢奏聞本求賑貸皇恩廣被玄造曲成既免在田之征仍頒發廩之賜臣謹宣赦文節目彰示兆人鼓舞歡譁自中徂外臣初到所部便遇儉時今蒙聖慈特有賑恤主恩及物已為壽域之人衆意感天必有豐年之應臣恪居官業不獲拜舞闕庭臣無任

謝恩放先貸斛斗表

前人

臣某言臣奉五月二十九日勅牒據度支所奏諸道節度觀察使及州府借便省司錢物斛斗等數內當州欠三萬六千二十三貫石並放免者殊私忽降逋債條除藩集作一方永安遐邇咸悅臣某誠歡誠喜頓首頓首伏以關輔之間頻年歉旱田租既須矜放公用交不支持承前長吏例有借便以救一時之急皆成積欠之名既未支填常懷憂懼聖恩周洽洞見物情爰命有司使之條奏去其舊弊衆已獲安嚴立新規人知所措臣恪居官次不獲拜舞闕庭臣無任抃躍屏營之至

蘇州謝賑賜表

前人

臣某言伏奉去年二月十五日勅蘇州宜集作賜米一十二萬碩委刺史據戶均給者恩降九天澤流萬姓伏以臣當州去年災沴尤甚水潦雖退流庸尚多臣前月到任奉宣聖旨闔境老幼無不涕零詢訪里閭備知凋瘵方具事實便欲奏論聖慈憂人照燭幽遠特有賑卹救其災荒蒼生荷再造之恩儉歲同有年之慶臣忝爲長吏倍萬恒情謹奉表謝以聞臣等云云

校四十一字

十月初五日

文苑英華卷第五百九十三

文苑英華卷第五百九十四

表四十二

謝茶藥

果子絲帛附

代武中丞謝新茶表三首

謝賜新火及新茶表一首

爲田神王謝茶表一首

謝衣藥表一首

謝賜廣利方表一首

謝賜藥方表一首

謝賜衣甲及藥物等表一首

爲宰相謝賜果實等表一首

代武中丞謝賜枅橘表二首

爲武中丞謝賜櫻桃表一首

謝進橙子賜茶一首

為御史大夫婁師德謝賜雜綵表一首

為定王謝賜錦衣表一首

謝勅書及綵綾表二首

為封大夫謝勅賜衣及綵綾表一首

謝內賜宴錦綵器物等表一首

謝賜銀器及疋帛等表一首

謝恩賜錦綵綾銀器等表一首

代武中丞謝新茶表二首

劉禹錫

臣某言中使某奉宣聖旨賜臣新茶一斤猥沐深恩拜露

殊錫承旨慶抃省躬慙惶臣某中謝伏以貢自外方名

珍殊衆品効參藥石芳越椒蘭出自仙厨俯頒私室義同

推食空荷於曲成責在素餐實慙於虛受臣無任

二

臣某言中使竇國晏奉宣聖旨賜臣新茶一斤猥降王人

光臨私室恭承慶賚跪啓緘封臣某中謝伏以方隅入貢

採擷至珍自遠貢來以新為貴捧而觀妙飲以滌煩顧蘭

露而慙芳豈柘漿而齊味既榮凡口倍切丹心臣無任

同前

柳宗元

臣某言中使竇某至奉宣聖旨賜臣新茶一斤者天睠忽

臨時珍俯一作驟及捧戴忙驚以兢集作善以惶臣某中謝臣

以無能一本作惟存庸臣諤司邦憲大明首出一作照非得親仰於

雲霄渥澤遂一作流行忽一作處先霑於草木况茲靈味一作品

成自遐一作遠方照臨而甲拆惟新煦嫗而芬芳可襲調六

氣而成美扶萬壽以効珍豈臣集作可非賤微庸此殊錫對恩

敢同於嘗酒滌慮方切於飲冰十四字一作感恩撫事循

涯墮越無地臣不任感戴欣忭之至

此篇本卷重出今已削去注異同為一作

謝賜新火及新茶表 武元衡

臣某言中使至奉宣聖旨賜臣新茶二斤者慈澤曲臨恩

波下浹光燭問里榮加賤微驚歡失圖荷戴無九臣某中

謝臣庸瑣無堪謬參風憲曠官尸祿已涉歲年竊位妨賢

心知不可陛下弘上天之私覆迴白日之餘光錫貢對恩

布芳新於令節鑽燧改火燭幽昧於蓬門既荷惟新之恩

更沐時珍之賜將何以仰申裨補俯効消埃惟當焚灼丹

誠激勵愚魯况先朝之恩未報陛下之澤又深省分循涯

伏增墮越無任感戴屏營之至

為田神玉謝茶表 韓翃

臣某言中使至伏奉手詔兼賜臣茶一千五百串令臣分

給將士以下聖慈曲被戴荷無階臣某中謝臣智謝理戎

功慙盪寇前恩未報厚賜仍加念以參蒸恤其暴露榮分

紫笋寵降朱宮味足蠲邪助其正直香堪愈病沃以勤勞

飲德相歡撫心是荷前朝饗士徃典犒軍皆是循常非聞

特達顧惟荷幸忽被殊私吳主禮賢方聞置茗晉臣愛客

文苑英華 卷五百五十五

纔有分茶豈如澤被三軍仁加十乘以欣以抃感戴無階
臣無任云

謝衣藥表

張說

臣某言伏奉某月日恩勅賜臣衣及藥溼流璿極綵溢旌
門拜奉抃集作戴舞感戴忻越集作載欣載越臣受律虧方扞城無
寄偏師不振逋寇仍滋進慙計日之功退積踰時之咎誠
合歸罪司寇以壓深責豈圖天寵猥臨宸慈寬假當從褫
服英華敗作非轉承且吉之衣宜肆典刑翻加有喜之藥毀車
夷馬復振鑿和窮灰枯蕘集作莖非重殷集作敷榮燄踣影邊塞
馳心闕城微命易歿集作授生成難謝無任感戴之至

謝賜藥表

臣某言去年某月日於右銀臺門蒙天恩引對特承慰問
攝理無方以致熱疾緣在假內不敢奏聞聖慈憂軫詔使
臨門伏枕在床雖體氣未適趣風拜命覺膝理遂平恩榮
豈止於丘山朽質未延於龜鶴無任感戴之至謹奉表陳
謝以聞

謝賜廣利方表

劉禹錫集無

臣某言中使至伏奉某月日勅書手詔賜臣元集要廣利
方五卷者將吏森列黎元寂聽絲言溥及感荷德音緗秩
頽開皆覩聖作臣某中謝伏惟皇帝陛下玄風御宇教以
五常赤子愛人念其六疾遂長驅和扁高視農軒刪彼繁
蕪撫其簡驗莫匪十全之妙不勞三代之醫况慮軫服乘

療單牛馬圓首方足畢荷亭育之恩含齒帶脣盡歸仁壽
之域臣奉明詔併工繕錄俾封疆之內日月俱懸雖聳聳
而必知在幽偏而亦達臣所守有限不獲走奔闕下蹈舞
彤庭無任踴躍屏營之至

謝賜藥方表

符載

臣某言中使朱萬春至伏知聖旨念臣風疾賜臣手詔并
賜御札藥方四道天使忽臨宸翰猶濕跪捧驚越不知所
從臣某中謝前月九日臣飲食失宜誤為熱風所中初甚
沉頓肢體不安今漸調護稍用衰退伏以微臣之疾貽陛
下之憂降駟騎於雲霄出神方於禁掖循端究末味密思
精補神農之闕遺茂桐君之漏畧乾坤恩重螻蟻感深將
欲調和已知平逾此所謂半枯之樹遇陰陽而扶疎
之魚值洪波而奮迅仰天抃躍跼地兢惶惟兩曜以鑒誠
何百年之可報不勝感戴懇迫之至

謝賜衣甲及藥物等表

令狐楚

臣某言中使某至伏奉勅書手詔兼賜臣衣甲器械刀斧
銀器及藥物等并賜臣下軍將者賜因寄重報覺身輕蹈
舞若驚載忻載躍臣某中謝臣力慙致一作果迹忝理戎

六月之師纔申國討九天之詔先布皇慈將以忠勤恤其
暴露側身拜命覩物知恩念臣或抱羸疴是加藥物矜臣
必摧亮醜載錫戎裝弓倍六鈞刀逾百鍊衣分玄甲戰則
保全器有白金食唯豪貴寵連諸將榮冠一時漢主賜人

空聞寶劍宋朝頒藥，但理金瘡豈如兼備五兵盡蠲萬病。榮茲陋質感戴奚殫，無任感恩捐軀之至。

為宰相謝賜果實等表

孫逖

臣等今日頓承賜賚累降珍鮮飽德空深荷恩無力伏以甘果之實類今則非時寧唯自遠而來固亦以少為貴當供御膳以備天厨何幸小人之腹忽辱非常之賜未施塵露空忝稻梁悚戴慙惶罔知攸措謹奉表陳謝以聞

代武中丞謝新橘表

劉禹錫

臣某言中使某至奉宣聖旨賜臣新橘若干顆特降恩光猥頒慶賜珍踰百果榮比兼金臣某中謝臣伏以丹實初成苞貢爰至芬馨味重方列於御筵雨露恩深忽霑於臣品感同推食事等絕其豈惟適口為珍實冀捐軀上荅臣無任感戴之至

代武中丞謝新柑表

前人

臣某言中使某至奉宣聖旨賜臣新柑若干顆猥集作持殊私再頒名果自遠稱貴以新為榮臣某中謝伏以果實既成南方有貴瓊茅合貢中禁為珍集無此四字句方外貢來人

間未覩黃苞輝穎雕俎增華芬芳初佐於天庖慶賜忽霑集作遂於集作凡口其踰萍實剖食既同於楚謠寒比柘漿析

醜何慙於漢史恩光斯重尸素彌彰誓當捐軀以申上荅四句集作感恩臣無任感戴之至思効倍百恒情

為武中丞謝賜櫻桃表

柳宗元

臣某言中使某至奉宣聖旨賜臣櫻桃若干顆者天睠特
深時珍存落降寵驚里巷恩溢圓方臣某誠喜誠懼頓首頓
首伏以含桃之羞時令攸貴况今採因御苑分自天厨使
發九霄集繁星而積耀味調六氣承湛露而不晞盈堦而
外被恩光適口而中含渥澤顧慙素食彌切自公豈徒君
子所先遂厭小人之腹無任感恩喜荷集作懼之至

謝進橙子賜茶表

常袞

臣某言中使某至奉宣恩旨以臣所進太清宮聖祖殿前
橙子賜茶百串榮賚非次承命兢惶伏以陛下尊玄元於
上官本枝既盛降馨香於嘉木果實自珍常令護領之司
及時採掇以進臣謬當率職正在戎期豈望皇澤之曲臨

寵及下臣之私獻貪天是懼踏地戴惶無任

為御史大夫婁師德謝賜雜綵表 李嶠

臣某言顯福門宣勅出綵八十段賜臣充軍裝臣才質駑
下智能短乏謀非上畧識豈中權謬奉殊私猥參大任雖
鑿門之志必掃妖凶而受鉞之功未宣戎幕遽延寵命先
承優賞懷恩揆拙既懼且慙唯當誓骨銘心永緘天地之
施觸鋒突刃常為士卒之先度邀犬馬之勲遂滅鯨鯢之
黨七擒三捷捷誠所庶幾九死一生豈當還顧無任悚戴歡
忻之至謹奉表陳謝以聞

為定王謝賜錦表

前人

臣攸暨言伏奉恩旨以臣昨扈遊上苑執轡還宮特賜臣

瑞錦一疋臣某中謝承輝日月漸潤雲霄叨符聖慈累延
宸照遂得入陪金殿出捧玉輿瑤水參八駿之遊璿臺翊
三龍之舉榮兼侍從寵冠宗枝捧日無以儷其歡登天未
足儔其樂昔蟻封啓繇不廻參乘之恩駟馬從良寧承附
輿之澤在臣叨忝實邁古今徒欣不世之榮豈望非常之
賜况臣地兼臣子職奉君親慙尋咫尺之途纔捧神仙之
馭有何殊効合降隆私陛下恩愛曲成綢繆累洽俯廻珍
異徼及庸微跪開緘題伏視文彩爛若朝霞之初起曄如
春花之競發成都濯具本自非儔朝鮮製衣制如難擬方
且裁而學政希勉勵於天工服以晝遊庶光榮於戚里効
微施廣徒益慙惶恩重命輕罔知酌谷無任悚佩之至謹
詣閣奉表陳謝以聞

謝勅書及綵綾表二首

李邕

臣邕言內使左立真至伏奉去年五月二十日御禮慰問
并賜綵綾章服跪捧天書勢在龍武仰瞻禮物色映虹霓
慙戴汗流戰懼心慄臣某中謝臣聞食曰人天實生生之
厚道稱物母得存存之多伏惟陛下載以坤輿覆以乾宇
排衆口之謗開獨見之明生臣存臣至於數四寵及問及
彌於再三豈魯陽宵人景日廻照荆樹散木慶雲結陰臣
是以坐有所思行冀所得求西山之藥願補聖躬論東戶
之人以分帝念識愚不足以廣聽事蹟不足以動忠夫何
望焉非所隱也豈謂塵壤見納推言不遺獎以及誠許以

佳士澤深巨海德重崇丘曷云家奉賜書光華九族物延
世唐諱舊褻寵百齡淥水之龜且能廻首黃華之鳥將以
誓心惟報主之末由恐殺身之無益不任戴荷欣躍之極
謹因內使左立真附表云

二

臣某言伏奉去年月日御札特賜臣章服綵綾等八體神
變廻龍鳳之殊姿五色暈開動雲霞之仙氣臣誠歡誠喜
頓首頓首臣聞礎之潤也是足興雲戈之鋒也或能照水
雖言微物有以上通常未察焉今可明矣伏惟陛下下一武
一文廓彌綸之道乃神乃聖䟽造化之元盛業極天鴻休
紹古子育庶物匯伏百蠻溟渤不波沙朔無障太平之律

大聖之功不得已而用之也猶且增高彌短廣大衆流錄賢
傾守內之心捨過求天下之俊所以喁喁者將百身以効
節區區者願一報以瀝肝况臣拔自九原泉出於萬死再收
骸骨更造衣冠舌在不足以歌堯命存未能以報國豈謂
上仁德廣澤利無益之臣博愛理深慈育不才之子天門
下詔橫筆陣於長山御府賜衣列錦川於淄水臣道子道
何顏受之今恩昔恩曷云報者戴天知重望日懷慙無任
悚惕震惶感戴抃躍之極謹昧死逝表陳謝以聞

為封大夫謝勅賜衣及綾綵表 張渭

臣某言中使某至奉宣勅旨賜臣衣若干事目覩綵綸手
披篋笥新衣二稱虹電間出綵綾五色鸞鶴互飛臣受鉞

西門建旗北府地僻萬里天遠九重豈意仁出於聖心賜出於御府白日亭午忽蒙慶雲之惠清秋屈節偏承玉露之恩負丘山而忘疲瞻闕庭而莫見臣無任

謝內宴賜錦綵器物等表

常袞

臣某言伏奉恩旨賜臣內宴仍賜錦綵綾絹四百匹瓶盤五事衣一副并柑橘等殊常之寵上戴若驚伏惟寶應元聖文武皇帝陛下恭儉以行禮慈惠以布政式厚君臣之義爰崇饗宴之道至如醴以命宥幣以將意非有方叔之勲魯侯之親則不可以禮奉和之樂溥將之也臣以至愚承弼無益尸官夙夜自惟兢兢失次尚蒙慈恕猶辱樞衡荐沐鴻私歡承嘉惠接雲霄之上境陪勲戚於內朝宸威

俯臨以戰以悚中食循省實慙孤賤微生遭逢一至於此睿眷流渥慈賞過豐廣乾坤而行慶俾下臣之受福束帛加璧申錫在於王庭珍噐黃柑浹洽至於歸第拜恩初喜審分增憂臣實非才事無任効待罪已久冒榮則多况戎患未寧寅車尚駕聖懷所軫日旰忘勞躬行儉素以濟軍國臣之俸祿猶合助邊臣之服用敢安私室今又俯霑慶賞將此勞臣雖宏覆曲全務於均施而丹誠上感實愧無功不勝荷懼屏營之至

謝賜銀噐及疋帛等表

此篇是辭賜表非謝表于邵

臣某言今日中使奉宣進止賜臣銀噐壺瓶各一銀椀一并蓋錦帳一錦九疋白熟綾十疋色羅五十疋雜綵

文苑英華卷第五百九十四
一百三十疋者恩私荐及跪捧增慙雖雨露殊深而心魂若厲何則臣之受遇有異朝班任重元戎榮登上相自當盡瘁與國同憂豈比常人妄加厚賜况戎夷初退帑藏猶虛每欲傾家以供國用區區之願神明所知乞回此物復歸內府下以備六軍之寵賜上以奉一人之宴私臣之鄙懷於斯萬足其器物等臣已勒押衙試少監郭某詣右銀臺門別狀奉進

云云

謝賜錦綵綾銀器等表

高郢

臣某言伏奉恩詔以告祔禮畢賜臣錦綵一百五十疋銀椀一無庸受恩不知所措臣某中謝伏以禘祫元祀從祔大經酌禮求中聖情合於天地奉先致孝精意刑於四海

臣職叨禮闈

一作祔

獲奉皇猷欣盛典於無窮顧微生而何

補謬霑慶賜竊自慙惶無任

按正五十五字十月初五夜龍友來譚去後乃畢此卷

文苑英華卷第五百九十四

沃叔子記

文苑英華卷第五百九十五

表四十三

節朔謝物 宴賜附

謝端午賜物表一首

謝端午賜衣表一首

為田神玉謝端午物表一首

謝端午賜衣及器物等表六首

謝社日賜羊酒等表一首

謝冬至賜羊酒等表二首

謝賜遊曲江宴表一首

謝京城東亭子宴送表一首

三月三日為百官謝賜宴表一首

謝觀內宴表一首

爲宰相謝賜永穆公主池亭宴表一首

謝賜宴表一首

爲楊中丞謝設表一首

代百僚謝許遊宴表一首

爲宰相謝內宴表一首

爲兩省官謝內宴表一首

謝端午賜物表

李嶠

臣某言中使某至伏奉手詔慰諭并宣口勅賜臣端午衣一副及銀碗百索等兼賜大將衣若干副者天書綢繆聖澤汪濊被服輝煥承恩隕越臣某中謝臣聞日移東井律應南風正陽爲納慶之辰長麻表文運之節臣謬膺任使備位守臣撫封而多愧無能望闕而遙思獻壽而陛下恩

單率土寵並勲賢俯因初五之辰遠頒尺一之詔衣垂繡靡之盛器飾雕刻之珍則辟邪寧假於赤符蠲癘詎勞於朱索况賜霑禪將化洽方隅仰荷殊私實慚非擬誓將誕敷渥澤保定藩維變淳風於邑里宣戎政於軍旅俾谿洞安靜波濤不驚伏惟皇明俯照丹慊臣無任

謝端午賜衣表

臣某言中使某至伏奉手詔慰諭并奉宣聖旨賜臣端午衣一副銀碗百索等大將衣兩副者王人遠臨天賚下逮承恩捧詔悸心汗流臣伏以正陽屆節初五授時萬國獻珍以稱壽九天垂衣而納慶至如靡麗出於王府頒賜及於方隅盖所以褒寵有功旌異有德顧臣庸劣未補涓毫

沐日月之齊明與勲賢而並命猥將固陋之質獲茲器用
之深衣降九天懼興刺於鵝翼縷分五色增長壽於堯年
何角黍之足稱豈織繒之爲比况賚及裨將澤被戎行顧
茲殊賜實愧非據臣一至湖湘拜周星歲翕皇風而蘇息
黎庶布聖澤而底定封疆今井賦不憊軍旅知訓庶期擴
悍之倍獲躋仁壽之域伏惟鴻造俯察丹誠無任

爲田神玉謝端午物表

張說

田神玉大曆中爲節度張說開元十
八年卒此表疑邵說代作英華恐誤

臣某言中使某至賜臣母趙國太夫人手詔并衣一副銀
梳一事百索十軸兼賜臣勅書及手詔并衣一副銀梳一
事百索十軸又賜將軍等衣共五副百索共二十軸者聖

慈稠疊感戴無階臣某

中謝

臣恭守舊規謬知重務功慙

毫髮寵荷丘山蒲篚詔書偏承睿顧傾家服玩皆自天來
叶彼良時旌其益壽淮南藥碗對此殊輕漢帝露盤方斯
匪重索盈千縷衣倍五時雨露恩深不遺於老母乾坤施
廣遍及於下臣受賜若驚銜恩載躍誓當戮力祗奉威靈
縱有百身何階報効臣無任感恩

謝端午賜衣及噐物等表二首 常衮

臣衮言中使羅希皎至奉宣恩旨賜臣衣二襲金銀噐物
十事百索兩軸扇一柄特降王人俯臨私第捧承殊賚祗
荷失圖臣衮誠惶誠恐頓首頓首伏以聖政惟新方求至
理天心所待豈止常才在臣庸愚何足驅使自受恩衮

已積三旬尸素廟堂未有能事固宜歸責誠合避賢聖恩
優容寵渥逾厚今屬三疑陽節五日御辰下濟天光曲
流霽澤王人班噐司服降衣飾其盤盂示以金玉王度總
其領會一作繪將何以黼藻朝章佩色絲而表祥捧輕箠而
迎暑寵光逾分憂負難勝出自禁中珍華未覩在於臣下
服用敢安既承飾外之恩彌積善中之懼無任感戴屏營
之至

二

臣某言中使某至奉宣聖旨賜臣衣兩襲金銀噐物十事
扇一柄百索兩軸伏以塵辱台司曠廢事任遭逢若此報
効無聞罪譴未知已荷曲成之施庸愚不逮恐傷刑賞之
明所以極冒宸嚴懇祈罷黜中慈未允外責彌深徘徊渥
恩醜愧朝列四時之錫累沐寵私五日之慶又蒙榮賚衣
服噐用特降珍華疵賤凡微曷堪光飾况師旅在外疆界
未寧口費千金篋無半菽今有功之士賞或未周無益之
實一作臣寵之過厚已紆成命不敢上辭惶赦拜恩實慙虛
受無任荷懼之至謹奉謝表以聞

同前

呂頌

臣某言中使至伏奉詔書并賜臣衣一副金花銀碗二枚
百索一軸大將衣兩副大明生東無遠不照時雨潤物有
形必需臣某中謝伏以朱明屆節端午良辰寶曆叶於重
商聖壽齊於兩曜臣凡愚賤質草木微軀謬居藩鎮之榮

獲守黔巫之地豈意聖慈天覆不隔遐荒珍物出於九重
麗服延於萬品臣與將校等雖備戎旅素乏勲庸當蠻徼
廓清之時霑普恩頒賚之慶榮分閩外喜溢行間仰戴殊
私用知所報不勝抃躍之至

同前

權德輿

臣某言中使陳忠玠至伏奉集作前月十七日手詔賜臣

端午衣一副銀椀二隻銀鈔羅二集作百索一軸并大將

衣服等慶賜遠降天顏如臨恩光綢繆器服輝麗成周士

吏居守輿師喜氣歡聲以感以抃臣某誠欣誠荷頓首頓

首伏以斗杓建午之初日永星火之際陰陽慶接天地氣

交陛下法象乾坤順行時令賀獻本臣子之志寵賚延君

上之恩孱微無庸踴躍斯甚佩長命之縷俾壽而臧捧在
笥之衣既安且吉然後大敷渥澤盡感鴻私顧已難酬此
生何幸無任荷戴踴躍之至謹附中使陳忠玠奉表陳謝
以聞臣誠歡誠抃頓首頓首謹言

同前二首

劉禹錫

臣某言中使劉元弼至奉宣聖旨慰勞臣及將佐官吏僮

道耆老集作百姓等兼賜臣墨詔并衣一副金花器三事

絲索集作一軸大將衣四副綵絲五軸籠光荐至慶賜曲

霑抃舞失容捧戴無力臣某中謝伏以朱明仲月端午佳

辰萬國被薰風之和九天垂湛露之澤臣幸逢休運獲守

外藩叨承睿慈猥霑集作榮賚發詔而煥窺宸翰集作振

衣而頓失炎威色絲表祥載光於佩服珍噐充玩盡飾於
圖方恩輝既盈喜懼交集下延裨將共荷鴻私

二集無

臣某言德音曲被喜溢群情厚賜遐頒榮霑陋質臣其中
謝伏以蕤賓在律端午御辰慶列丹墀守藩莫及恩隨綵
縷捧軸難勝况衣極珍織涼生温暑噐皆照爛光發戶庭
竊慙彼已之詩敢忘蒲盈之誠惟當蒞戎有勇訓俗知方
永懷銘縷之誠冀申赴蹈之節臣與大將無任感戴踴躍
之至

謝社日賜羊酒等表

常衮

臣某言内常侍王子昇至宣奉聖旨以社日賜臣羊酒脯

腊海味油麩粳米等仍特賜藥飲者喜抃失容競慙無措
臣誠惶誠悚頓首頓首臣叨踐台階已速官謗聖慈矜宥
殊貸曲全猶使省近掖之文重高門之地白骨并起飛寇
復還感恩若驚雖死何答伏以宰輔之任燮和所關自頃
憊陽向逾累月近方降雨今復周旬致令水旱不特陰陽
失序若令歸責臣亦何逃故事昭然所宜黜免且勾龍立
社祀典攸書太稷主農國章斯在以享田租以報秋成今
穎實未登粢盛乖望是君積憂之日是臣獲戾之時豈望
慶自雲天曲容酒食之宴恩霑疵賤下及膏粱之珍醉樂
空比於堯人宰平實慙於漢相無功受賜有覲何逃上戴
寵私益深惶惕無任抃躍屏營之至

謝冬至賜羊酒等表

前人

臣某言中使某至奉宣恩旨以至節賜臣米麪羊酒猪鹿雜味等伏以非才曠官微臣之愧耻待寬責薄聖造之矜容貸罪則多負恩已甚進思無補退復何顏以周官之職且乖於水旱而漢臣之賜空積於歲時屬北陸涸陰南郊迎日古今良節朝野同休天慈過深榮賚逾厚王人結駟膳宰駢輜特減內庖之珍遍賜遠方之異光華里閤充溢門閭臣本布衣列於賤品十年遇聖忽至層霄萬死酬恩豈裨大化素甘藜糗既飽於梁肉多乏濁醪既醉於醇酎荐沐非常之寵不知所忝之由少長對筵悲歡相慶何功而至此何力以任之捧戴若驚慚惶交集無任

周前

臣某言中使某至奉宣恩命以至節賜臣者聖旨頻降榮賚過優以周官百品之珍載頒其實雖魏臣五熟之釜豈容其多受賜踰涯拜恩失次臣出自孤微素常貧苦食不蒲腹竊誠脩身且奈不揜且飯惟脫粟昔賢之美其儉可師敢望豐盈重彰尸曠而雨露偏施歲時益榮俾奉先之饗味兼陸海合族之宴其及膏梁又沐深慈下霑中饋以感以慶啓處難勝無德無功慙惶罔極

謝賜遊曲江宴表

李邕

臣邕等言臣聞昔時人君之德也大撫萬國必親諸侯是以通下情序賓禮伏惟陛下因遇上已收接下臣順發生

之時弘在鎬之宴仙厨和鼎浹洽於廣筵舜瑟一作樂歌風
均調於曲水土女車騎充溢山川林薄光華纒連城闕臣
等撫躬何幸報德無階空慙尸素之名豈適輪轅之用不
任戴荷抃躍之至謹詣朝堂奉表以聞

謝京城東亭子宴送表

張說

臣某言力士至奉宣勅以臣臨岐特令賜宴恭承惠渥念
及庸微天地同仁木石知感不勝惶悚戴荷之極臣某中
謝臣歷觀自古君臣凡所際會或因緣黨進或因延接功成
故未竭謂而不知不言而信豈有地孤援寡毀衆謗深察蒙蔽
之中致曠蕩之外逢陛下特達之遇當陛下聖明之朝事
出非常澤均恩重今者誓將瀝血未足竭誠徒欲殺身豈
能報德至如勵精勤政與直守公酬陛下憂人之心行陛
下弘道之化敢安失墜以負神明但函關路遙長安日遠
不任戀主悽愴之至

三月三日爲百官謝賜宴表

宋璟

臣某言臣伏以漢崇元巳齊曰上游咸聞執蘭以盛禊飲
洛水之會囂呼不足紀也未和之遊僻陋不足追也臣等
生逢多幸遇會聖明賜與榮渥逾溢涯分詢於史策超軼
古今臣某中謝伏惟皇帝陛下屈已愛人布和施恩慶賞
所及萬國歡心財成之道與天悠久爰以令節錫宴公亭
萃集作翠帟文茵俱來天上嘉餽清醕亦自太官欣歡之聲
浹於億兆銜感之至形於頌歌而天心霽然宸章煥發曲

蒙賜示捧讀競懼涵泳五音光輝二雅流於箎磬未播無窮豈臣庸愚詎能思度今狂虜衰息年穀屢登俗被湛恩人歸壽域讌遊高會適助時康况上宰家卿脩眷長劍前後羅列小大相從所以序聖朝之多士爲百代之風流臣等叨榮無任懇迫報効何日進退知慚不勝欣抃之至

謝觀內宴表

前人

臣某等言伏以雲韶是稱天樂華夷不覩度品徒瞻伏惟皇帝陛下慶浹人神惠敷雲雨合飲於八仙伎降於九重遂使六樂增嘯萬人駭嘆豈激楚之足匹何鈞天之能擬况復飾無貨寶衣用大帛遠而望之如金翠之旅近而觀之同戈綈而髮其廣大也可以俗應陽和其純儉也可以人知軌物故能作程海內垂裕天長望編史冊永彰明聖臣等不勝悅豫之至

爲宰相謝賜末穆公主池亭遊宴表 孫逖

臣某言內使趙侃奉宣恩旨賜臣等明日於末穆公主池亭遊宴者謬承天澤頻賜春遊小人之腹每等於珍膳下里之聽屢聞於仙樂殊私荐及榮施難酬雖朝野多歡實樂太平之運而消埃莫効彌慙非擬之恩無任悚灼之至謹奉表陳謝以聞

謝賜宴表

常袞

臣某言臣一昨特荷聖慈曲承寵會今日又奉進旨臣兄太常丞臣某亦霑內宴仍賜錦綵百疋衣一襲并銀器等

非擬之任已忝股肱曲承之恩更及骨肉仰天增愧何地
有安臣某中謝臣聞禮之制也以飲食親宗族詩之義也
以愷樂宴嘉賓以通上下之情以展君臣之義將以裨於
風化故無謬於寵私伏惟陛下稽古以理宗儒之教示其
恭儉之訓溥頒雨露之恩叶時布和式崇饗宴至於需以
酒食昭其慈惠必先宗戚次及舊勳臣出於孤賤又乏功
勞無所克堪豈宜齒列臣兄何幸又沐殊榮寵極膳羞之
珍禮優筐篚之至合生成於同氣聚慶賀於私庭昔人獨
味於鹿鳴在臣兼輝於鴈序手足無措揣分空慙形影相
顧捐軀何答臣無任

爲楊中丞

集作謝設表

柳宗元

臣某言中使某乙至奉宣聖旨賜臣長樂驛設者恩榮特
殊宴飲斯及顧茲厚禮猥集微躬臣某誠懼誠慶頓首頓
首臣以多幸屬此昌時任重方隅職叅文武其受素餐之
刺知無肉食之謀以憂以惶寢寐無措豈謂鴻私繼至豐
膳委來陸海兼陳酒集作醴皆設庶當奉揚聖澤單布遠
人流愷樂於皇風均乳哺於赤子少陳微効上答殊私無
任感恩抃集作躍之至

代百僚謝許遊宴表

呂溫

臣某等言今月二十三日宰臣奉宣進旨集作如聞百寮
士庶等親友追遊公私宴集及晝日出城餞送每慮奏報
自今已後各暢所懷者志存必信義切同休令行如春神

應若響寒木暉潤嚴風變和推已感於人心發生先於天
意臣其中謝臣聞與人同其樂者不必盡致於韶夏之庭
在夫不奪其歡而已與物致於其誠者不必日効於冊
青之信在夫不察其細而已况乎縉紳之樂名教聚皆以
類臣子之事君父遊必有方豈足輕聳物情逐塵天聽伏
惟皇帝陛下光纂十聖威臨萬方集作國神武功就人文化
成窮溟無波豐歲將宴集作晏樂奏穆清感深乎共樂之道
駕言遊幸思所以適人之方爰詔輔臣式將明命優諭卿
士達於庶人琴筑追遊無憚京輦集作輶輜輶送遠勿限巖
城禁吏司之苛察盡朝野之歡泰始覺飛沉之樂宇宙之
寬物不自疑人知所措集作得所在宗載考夜飲承湛露之恩

求友相鳴時宴奉祥集作需雲之慶浹休聲於夷夏蒸昔氣

於山川千載之昌運允符百王之遺美斯舉臣等謬膺寄
任親奉休明方感生成之德更蒙優貸之詔恭承睿旨務
竭歡心飽思屬厭醉念溫克戒竹林之虛誕去金谷之浮
華君雖不察於泉魚臣敢有愧於屋漏承歡且懼居寵彌
驚稽首知慚殺身何報無任感恩兢惕之至

為宰相謝內宴表

錢珣

臣某言臣聞古之王道美在詩人爰徵式宴之名則有鹿
鳴之什俎豆既列筐篚亦陳群臣享而受之得使盡其心
也能追古道實在哲王臣某中謝伏惟尊號皇帝陛下聖
文有作臨照克明昨者以告見祖宗率兩宮而偕行重典

祈禱天地感百神而已報豐年方屬清和更弘慈惠遂當
暇日乃闢廣場旣接輔臣兼延卿士我心則悅洞開咫尺
之類不醉無歸畢降獻酬之禮而又深形睿旨新製樂章
但臣等忠則有思拙而無補陛下勉其翼戴播在絃歌竊
聽鏗鏘空知慚感爲恩如此何力可勝徒以宮殿飾同疑
文符混一舞成竒字更俟太平待季子之請觀笑吳宮之
教戰盡如解慍詎異聞韶况凡有嘉籙親令下筮巨細之
事指顧不違鴻私曲被於茲辰寵遇頗踰於往列仍蒙賜
賚且極纖華伏自侍宴已來還家自省燮理欲酬於玄造
終乏嘉謨傳聞空徧於遠方彌光聖德君臣共樂史冊可
書臣某等無任銜恩涕感歡榮抃躍之至

爲兩省官謝內宴表

前人

臣某等言臣聞謂傾心於百辟向日雖同觀拱極於衆星
在天各遠所以會朝之地每隔丹墀而燕私之嘉忽親黼
袞注渥恩而則可求故實以未聞事出常倫感深庶位臣
某等伏以考擊鍾鼓鋪陳几席恭惟列聖常命周行且屬
宴安仍須物用匪勞規畫始就歡娛今陛下以尚念多難
不爲自逸外開貢輸之數內無饒羨之資蓋以臨昧且而
謁宗祧彝章必具仰昊天而祈稼穡甘澤已類方當行慶
之時且欲與人同樂昨者昭垂睿睠俯接群僚忘憂而飲
備六清旣飽而羞踰百品戒膳夫之失飪詔酒正以如澠
賜者鮮闕行之皆徧飾喜則聲從禹律製曲則音自堯聰

樂和而鳳鳥應來舞妙而薰風共轉曲形文字全爲生靈
承天詔以咸觀兼聞金石泛恩波而已醉不待罇壘柏梁
殿唯召詞臣華林園亦非客座共當異寵難並茲辰光東
帶而更勵立朝顧綵繒而彌慚勝質則微臣非徒享滋味
聽鏗鏘而已霑纓感德稽首拜章臣某等無任荷恩激切
榮躍屏營之至謹奉表陳謝以聞

訂四十一字十月初六日校在北海抱素書屋

文苑英華卷第五百九十五